

itidem firma spina munitae, quatuor digitos longae, duos latae, Interstitio sex et semis digitorum post branchiales in infimo ventre (qui paulum extuberat) duae junctae, tres digitos longae, duos latae, in ambitu circinatae: septem digitorum intervallo a dorsali, alia in extremo dorso, carnosa, sesquidigitum longa, unum lata, in extremitate mollibus spinis munita, et sub hac in infimo ventre alia paulo major cauda sequitur trium digitorum intervallo, in duo cornua ducta, crassa seu molli membrana constans duos et semis digitos longa, in quolibet cornu duos lata. Totum caput superius, et ad latera, dorsum totum et latera ad protuberantiam ventris usque, candidi cum diluto flavo et aureo mixti est coloris, in testa capitis etiam aliquid viridis transplendet: *Pinnae* omnes et cauda gryseae sunt: Venter et laterum inferior pars et caput inferius (quod planum est) albi coloris. Caret squammis, sed vestitur cute. Bona satis est carne, melior quam Camarupi, cujus magnitudinem fere aequat.

Tertia figura et magnitudine ut praecedens, sed barbam habet quatuor tantum cirrhis constantem, duobus nimirum longis octo digitos, et latiusculis instar ligulae, duobus brevibus: ad pinnam dorsalem similis ligula novem digitos longa, et postbranchiales pinnas eodem modo: caetera similis praecedenti.

Quarta Belgis vulgo *Clipbagre* decem digitorum longitudinem habet; corpore oblongo: Capite lato et compresso: ore parabolico, edentulo. Barba constat sex cirrhis, quorum quatuor inferiores unum digitum, superiores duos longi. Oculos habet parvulos, caeruleoscentes, quatuor digitorum interstitio ab ore in summitate dorsi tegitur testa dura ossea, et postbranchias in quolibet latere py-

ramidalis testa angusta tegit latera. Pinnas habet septem, et octavam pro cauda: nimirum unam in summitate dorsi, elevatam, mollem, sesquidigitum altam, plus uno latam, anterieus spina ossea crassa dupliciter ferrata, duos et semis digitos lata sustentatam. In medio ventre infimo duas parvas: in fine paene dorsi, carnosam, parvulam, angustam, et e regione huius inferius aliam parvulis spinis suffultam; cauda diffusa in duo cornua sesquidigitum longa. Tegitur cute: ac in capite, initio dorsi et lateribus, ubi testaceus est, umbrae est coloris, per reliquum totum dorsum et latera umbrae dilutioris, et fuscis maculis medioeris magnitudinis variegatur: in ventre albicat. A testae latiore fine ad caudam usque in quolibet latere, per lineam rectam tendit ordo denticulorum acutorum, posterius versus, qui clypeo duro serrato in medio insunt, nam anguli obtusi figura positi sunt usque ad caudam hoc modo 7.

Edulis est, sed pauca carne, quae non magni fit.

Quinta praecedenti similis, et maculis nummi misonici magnitudine variegatus: Verum caret denticulis illis in lateribus: lineam solummodo habet: et duos cirrhos, et sex longiores quam alter. Haec species habet carnem bonam et pinguisissimam.

Sexta magnitudine et figura similis illi, quem secundo loco descripsimus: sed barbam habet tantum quatuor cirrhis constantem, duobus nimirum longis octo digitos et latiusculis instar ligulae, duobus admodum brevibus. Ad pinnam dorsalem similis ligula est novem digitos longa; et ad postbranchiales eodem modo; caetera per omnia similis illi, quem diximus; nam et ventrem ita protuberantem habet.

ARTICVLVS VII.

De *Ajereba*, *Jabebirete*, *Niqui*, et *Guatacupu*.

AIEREBA Brasiliensibus *Rajae* species, piscis planus, circinatus, unum pedem et novem digitos longus, et totidem latus (reperiuntur

et duplo maiores.) Quatuor digitorum interstitio ab anteriori circumferentia in superiori superficie duo foramina habet satis ampla, tres digi-